



Rapport annual 2018

Preziadas commembras, preziai commembers

Igl onn 2018 ha entschiet per l'uniun cun igl Apero Daniev ils 2 da schaner 2018 en casa da scola. Sche haiel dumbräu correct ha quel già giu liug per la tiarza gada. Giuven e vegl han gudiu la cumpignia tier in bien apero cun spezialitads da Vrin, in glas vin ni in auter refrestg. Ensemen cun commembers dil chor mischedau da Vrin/Surin han ils presents intunau numerusas canzuns. Pieder Alig ha mirau che las pausas denter las canzuns seigien buca memia grondas. Jeu haiel constatau che cantar en cumpignia ei in grond plascher e fa bein. Quei han era las reacziuns dils presents mussau. En quei senn in grond engraziament al chor ed a Pieder.

Simona e Martina Caviezel han organisau e mussau dus films da pli baul «Il purtret da Vrin» digl onn 1970 <https://www.nossaistorgia.ch/medias/90251> ed il film dalla «Fiasta da cant Sursilvana a Laax» digl onn 1984 <https://www.nossaistorgia.ch/medias/90190>. Conta glied che vivevan da quels onns a Vrin ... Biars ch'ei buca aunc emblidai. Bein enqualin dils presents ha enconuschiu sesez en quels films e forsa giu in surrir sin las levzas.

Igl onn 2017 ei l'uniun stada senza presidenta ni president. Igl atun 2017 ha Martin Sgier il vicepresidente dall'uniun dumandau mei sche jeu vegli surpender quei post. Suentar ponderar e sclarir giu l'ina ni l'autra damonda haiel decidiu da surpender quella incumbensa. Alla radunonza dils 3 da mars 2018 sundel vegnida elegida sco presidenta. Jeu engraziel a vus tuts per la fidonza en mei.

Igl viadi dils 15 d'uost ha menau nus a Surcasti. 18 commembers dall'uniun ein i a pei da Vrin a Surcasti. Dallas 09.00 essan nus sentupau sin plaz scola. Il sulegl ha accumpignau nus sin igl entir viadi. Gabriel Alig e Gion Giusep Caviezel eran già semess in tec pli baul sin via. Avon Surcasti havein entupau igl emprem Gabriel e lu pli tard Gion Giusep. La punt da pender denter Silgin e Pruastg ha buca plaschiu a tuts mo traversau havein nus tuts ella. Ina pausa havein pér fatg cuort avon Surcasti.

Ella Casa da Luzi essan nus lu vegni ensemen cun ils vischins da Vrin ch'ei vegni cun auto. En tut eis ei stau 28 participonts che han astgau guder in grondius pushegn ella Casa da Luzi. Suentermiezgi ha Simon Derungs fatg cun nus ina tura atras Surcasti. El ha giu bia interessant da risdar. Il viadi ei lu ius a fin tier il casti da Surcasti. Ueli Gloor ha



spitgau cun il bus da vischnaunca per turnar cun ils pli passai denter nus direct enta Vrin. Tschels ein i anavos a Surcasti e turnai cun autos privats. Per il survetsch dallas chauffeusas e ils chauffeurs in grond engraziament!

Anavos a Vrin havein nus terminau nossa excursiun el hotel Péz Terri. Quei firau ei verament staus in gi da fiasta.

L'uniun Cuminonza Vrin dumbrava il davos digl onn 2018 100 commembras e commembers. En cumparegliaziun cun igl onn vargau ei quei treis persuna dapli.

El decuors digl onn havein nus giu 3 sesidas da suprastonza. L'emprema ha adina liug ensemen cun la cumissiun Fondo Greina per decider sur dallas damondas per contribuziuns. La secunda ha era giu liug cun la cumissiun Fondo Greina. Ei mava per la damonda d'organisar ina fiasta «20 onns Fondo Greina» ils 12 da matg 2018 ensemen cun Sumvitg e la fundaziun svizra per la tgira dalla cuntrada. Sumvitg haveva negin interess da gidar organisar in tal eveniment. Aschia ha la cumissiun Fondo Greina decidu da dir giu quella fiasta ch'era en emprema lingia previda per las medias. Engraziel ha l'uniun detg als dus revisurs, ils commembers dalla cumissiun Greina ed alla suprastonza ils 10 da mars 2018 cun ina buna tscheina en Val.

Engraziar lessel a mes dus collegas dalla suprastonza Martina Caviezel e Martin Sgier che gidan mei en quella situaziun nova d'ina presidenta d'uniun e naturalmein era a Vus tuts che gideis tier fiastas ni autras occurenzas, che fageis part da noss'uniun, che steis fideivels ad ella e che tgireis nossa cuminonza.

Vrin, ils 8 da mars 2019

La presidenta: Andrea Portmann